

1 Jon

Nəkwəkwə yame Jon rimirai məkupən

Nəgkiarien kupən ye nəkwəkwə e Fas Jon

?Pa rimirai nəkwəkwə e? Aposol Jon rimirai nəkwəkwə e. In piau Jemes, kini iriu ji Sebedi mir. In aposol kirik kape aposol 12 kape Yesu. Kini in yermamə e yame Yesu rorkeikei pik. In rimirai nəkwəkwə minə e: Nəvsaoyen Huvə yame Jon Rimirai, 1 Jon, 2 Jon, 3 Jon, mine Revelesen.

?Rimirai ramvən kimi nipa? Rimirai nəkwəkwə e ramvən kimi nəməhuak minə ikin minə fam. In rorkeikei mə narmamə kirikianə kirikianə taksəvhekin, misher-pən kin nəkwəkwə e rivən ye niməhuak pisin pisin aikin minə fam.

?Narəyen rimnhawor pən iran mine nipig rimirai? Ye nipig a, narmamə tiksın khamə Yesu in yermamə apnapig əmə, kini Nanmin kape Kughen rimauə əmə ye nipran nipig Jon Baptaes rimnor baptaes iran, kini mətə iran nipig rimamhə ye nai kamarkwao kin. Mərig nhajounien a in neikuəyen. Yesu in Kughen, In rimauə mor niprai yermamə kin. Kini iriə mishajoun min mə norien has in rirkək. Mhamə rhuvə əmə mə narmamə taksor apnapig əmə norien has mərig in ai ye kapəriə nhajounien, niprai yermamə in nar apnapig əmə. Nhag nhajounien minə a, ye nəgkiarien kape nəmə Gris, kamni kimə, “Nosticism.”

?Rimirai nəkwəkwə e tuk naha? Jon rimirai nəkwəkwə e mə tukrhajoun min nəgkiarien yame ratuatuk, kini mə tukrini-ərhav neikuəyen minə e kape nəmhajoun eikuə minə. Kini ramhajoun mə norkeikeiyen in nar ehua. Kini morkeikei mə tukrasitu, mor nhatətəyen kape nəməhuak minə ruə miskai kini mharkun huvə min mə Kughen rimivəh miragh əfrakis əriə, iriə mhavəh nimraghien rerin.

Nəgkiarien Mragh

1 ¹Yakamhani-ərhav Nəgkiarien kape Nimraghien. ^a Kwasig ikin Kughen rimnor narimnar fam, Nəgkiarien e rimnəkupən marə. ^b Kimawə yimisərig, kini misəm kin nimirawə, ^c kini mharap kin kwermimawə. ² Kini Nəgkiarien ai ritərhav-pə; ^d yimisəm, masarer-ərhav mamhani-ərhav, ^e kini mamhani-pre min tuk əmiə mə In e In nimraghien rerin. Iriu Rimtawə Kughen, kimwəkupən mwarə, kini rimnajiərhav-pə tuk əmawə. ^f ³ Yakamhani-ərhav-pre tuk əmiə narimnar yamə mine yakməsəm kini mwəsərig-ta, mə kimie min takhauə kisor kirikianə kitawə-m kimie. Kitawə Rimtawə Kughen mine Tini Yesu Kristo tukhauə kirikianə. ^g ⁴ Yakamharai narimnar minə e mə tukror rikitawə ramagien pik əmə.

Nəriwəkien ye nikhakien

⁵ Nəgkiarien e in e yimisərig tukun kini mhani-ərhav-pre tuk əmiə, mə Kughen, In nikhakien, ^h kini nəpignapien rirkək əfrakis iran. ⁶ Tukmə kitawə kamhani mə kwənhauə kirikianə kitawə min, mərig kitawə kaseriwək əmə ye nəpignapien, ⁱ kitawə kaseikuə, kini mhapəh nisarəyen ye nəfrakisien. ^j ⁷ Mərig tukmə kaseriwək ye nikhakien, rəmhen kin yame Kughen ramarə ye nikhakien, ^k kitawə kwəsor kirikianə kitawə min; kini nitaw Yesu, Ji Kughen, rimnəspir rikitawə tuk nahasien m-fam, mor kitawə kisatuatuk ye nimri Kughen.

⁸ Mərig tukmə kitawə khamə khapəh nisorien təvhagə hah, ^l kini miseikuə atuk əmə irətawə, kini nəfrakisien rirkək irətawə. ^m ⁹ Kughen In ratuatuk, to rapəh nakapirien nəgkiarien kafan. Kini tukmə kitawə khani-ərhav təvhagə hah kapətawə, ⁿ In tukrəspir ətawə, məru-kin norien has mifam kapətawə, mə tuksatuatuk ye nimrin. ^o ¹⁰ Mərig tukmə kitawə khamə khapəh nisorien təvhagə hah, kitawə kasor mə Kughen In yeikuə, kini nəgkiarien kafan rapəh nəmirien ye nimraghien kapətawə. ^p

Yesu Kristo in yermamə kape nasituyen irətawə

2 ¹ Kwajikovə minə kafak, ^q yakamrai nəgkiarien e kimi əmiə mamni-əhu əmiə mə takhapəh nisorien təvhagə has. Mərig tukmə kasor

^a 1:1 Jon 14:6 ^b 1:1 Jon 1:1,3 ^c 1:1 Luk 24:48; Jon 1:14; 19:35; 2 Pita 1:16; 1 Jon 4:14

^d 1:2 Jon 1:1-4; 11:25; 14:6 ^e 1:2 Jon 15:27 ^f 1:2 Jon 1:1-4 ^g 1:3 1 Kor 1:9

^h 1:5 1 Tim 6:16 ⁱ 1:6 Jon 3:19-21; 8:12; Efes 5:8; 1 Jon 2:11 ^j 1:6 1 Jon 2:4; 4:20

^k 1:7 Aes 2:5 ^l 1:8 Jer 2:35; Rom 3:9,19; Jem 3:2 ^m 1:8 1 Jon 2:4 ⁿ 1:9 Sam 32:3-5;

51:2; Prov 28:13 ^o 1:9 Jer 31:34; Maeka 7:18-20; Hib 10:22 ^p 1:10 Jon 5:38

^q 2:1 1 Tes 2:11

təvhagə hah, yermamə kirik kapətawə tukrəgkiar atuə kin kapətawə kimi Kughen.^r Yermamə e In e Yesu Kristo, yemə atuaturuk. ² Yesu e, Kughen rimivəhsi-pən narpinien kape təvhagə has kapətawə kimin, nitawin rimnaiyu.^s Nitawin rimnaiyu, pəh nien mə kapətawə pisin əmə, mərig kape narmamə m-fam ye tokrei tanə.^t ³ Mərig tukmə kitawə kasəri-pən nəgkiarien kape Kughen,^u ramhajoun mə kitawə kharkun huvə mə kwənhauə minharkun Kughen.^v ⁴ Tukmə yermamə rimə rirkun Kughen^w mərig rapəh nəri-pən-huvəyen nəgkiarien kafan, in rameikuə əmə; nəfrakisien rirkək iran.^x ⁵⁻⁶ Mərig yermamə yame rəri-pən huvə nəgkiarien kafan,^y norkeikeiyen kape Kughen ramkuə əfrakis kin norkeikeiyen yerkin.^z ^a Yermamə yame ramni mə in ravəh Yesu yerkin, tukraməkeikei məri-pən swatuk kirikianə əmə yame Yesu rimnəri-pən.^b Norien a tukramhajoun^c mə kitawə kamhavəh Yesu yerkitawə.^d

Kitawə tukasəkeikei masorkeikei ətawə minə

⁷ Yo minə tiksın, pəh nien nəgkiarien vi kirik yame yakamrai kimi əmiə mə taksəri-pən;^e mərig nəgkiarien akwas kirik yame nakwəsərig-ta kupən.^f Nəgkiarien akwas e nəgkiarien yame nakwənharkun-ta. ⁸ Mərig, nəfrakis, ramor mə nəgkiarien vi kirik tuk əmiə.^g Kini, nimraghien kape Yesu mine kapəmiə kawor əpu kaməm mə nəgkiarien e rəfrakis, meinai taktəkun ai, nəpignapien rinamrikək,^h kini nikhakien əfrakisⁱ rinakhak-pə.^j

⁹ Kini yeməhuak kirik yame ramni mə in ramərer ye nikhakien, mərig raməməkin nəməhuak minə tiksın,^k yermamə en ramarə hanə ye nəpignapien.^l ¹⁰ Mərig yeməhuak yame rorkeikei nəməhuak minə, in ramarə ye nikhakien.^m Kini nar kirik to rapəh norien rimir.ⁿ ¹¹ Mərig tukmə raməməkin in kirik, ramarə hanə ye nəpignapien,^o rimuvrig əpis in, raməriwək əmə ye nəpignapien.^p

¹² Kwajikovə minə kafak, yakamrai nəkwəkwə e raurə kimi əmiə, Meinai Kughen rinəspir-ta təvhagə has kapəmiə kin norien yame Yesu rimnor.

¹³ Tatə minə, yakamrai nəkwəkwə e raurə kimi əmiə, meinai kimiə nakwənharkun-ta In yame rimnəkupən mamərə kwasig ikin Kughen ror narimnar.^q

^r 2:1 Rom 8:34; 1 Tim 2:5; Hib 7:25 ^s 2:2 Rom 3:25; 1 Jon 4:10 ^t 2:2 Jon 3:17

^u 2:3 1 Jon 4:13; 5:2 ^v 2:3 Jon 14:15 ^w 2:4 Taet 1:16; 1 Jon 3:6; 4:7,8 ^x 2:4 1 Jon 1:6,8

^y 2:5 Jon 14:15 ^z 2:5-6 Swatuk pisin kirik kape nukreikinien v 5: "Mərig yermamə yame rəri-pən huvə nəgkiarien kafan, in rorkeikei pik Kughen." ^a 2:5 1 Jon 4:12

^b 2:5 Mat 11:29 ^c 2:5 1 Jon 2:3 ^d 2:5 Jon 15 ^e 2:7 Dut 6:5; Lev 19:18

^f 2:7 1 Jon 2:24; 3:11,23; 4:21; 2 Jon 5,6 ^g 2:8 Jon 13:34 ^h 2:8 Rom 13:12

ⁱ 2:8 Jon 1:9 ^j 2:8 Efes 5:8; 1 Tes 5:5 ^k 2:9 1 Jon 3:10,15,16; 4:20,21 ^l 2:9 1 Jon 1:5

^m 2:10 1 Jon 3:14 ⁿ 2:10 Sam 119:165 ^o 2:11 1 Jon 1:6 ^p 2:11 Jon 11:9; 12:35

^q 2:13 Jon 1:1

Nitamaruə, yakamrai nəkwəkwə e raurə kimi əmiə,
meinai nakwəsəpita^r yemə has ai Setan.

14 Kwajikovə minə, yakamrai nəkwəkwə e raurə kimi əmiə,
meinai nakwənharkun-ta Rimtawə Kughen.

Tatə minə, yakamrai nəkwəkwə e raurə kimi əmiə,
meinai kimiə nakwənharkun-ta In yame rimnəkupən mamərə
kwasig ikin Kughen ror narimnar.^s

Nitamaruə, yakamrai nəkwəkwə e raurə kimi əmiə,
meinai nakwənhaskai,^t nəgkiarien kape Kughen raməmir irəmiə,
kini nakwəsəpita yemə has ai Setan.^u

15 Takhapəh nisorkeikei-pik-ien norien kape tokrei tanə mine
narimnar fam kape tokrei tanə.^v Yermamə yame rorkeikei pik narimnar
kape tokrei tanə, norkeikeiyeen kape Rimtawə Kughen rirkək yerkin.^w

16 Meinai norien m-fam kape tokrei tanə khapəh nhasi-pənien ye
Rimtawə Kughen, mərig kape tokrei tanə əmə. Norien m-fam kape
tokrei tanə, irisir e: Riki jir raməkrəh,^x kamanipin tuk narimnar kape
nīprai jir əmə,^y kīvəhsi-haktə jir tuk nautə mine norien kafan. 17 Mərig
tokrei tanə e tikripirkək, mine narimnar m-fam yame ramswin iran
mavi nərgien.^z Mərig narmamə yamə mine kasor nəkwai Kughen,^a
tuksarə kape rerin.

Tikmir minə kape Kristo kwənhauə ta

18 Kwajikovə minə kafak, kitawə kwənhauə ye Nipig Kwasig.^b
Nakwəsərig mə tikmir kīrik kape Kristo tukruə.^c Kini taktəkun ai, tikmir
minə khapsaah kape Kristo kwənhauə ta.^d Kwənhauə, kitawə kharkun
mə kwənhauə ta ye Nipig Kwasig. 19 Iriə kwəsəpəh kapətawə niməhuak
minə,^e meinai iriə, pəh nien mə kitawə əgkəp minə tiksın əfrakis a. Ripi
mə kitawə əfrakis əgkəp minə tiksın a, to kipihipəh nisəpəhyen ətawə.
Mərig iriə kimisap-ta irətawə, ramhajoun mə iriə pəh nien mə kitawə
minə tiksın.

20 Mərig kimiə, Kristo, Yemə Imərhakə, rinəvrai-pre-ta Nanmin Rhakə^f
kimi əmiə mor kimiə nakharkun nəfrakisien. 21 Yakamrai nəkwəkwə
e kimiə əmiə, pəh nien mə nakseinein nəfrakisien, mərig kimiə
nakwənharkun ta nəfrakisien, kini minharkun mə nəfrakisien ripəh
nikuəyen kin neikuəyen.^g 22 ?Pa e in yeikuə kīrik? Yermamə yame ramni
mə Yesu pəh nien mə Kristo yame Kughen rimirpen. Yermamə e in e, in

^r 2:13 Jon 16:33 ^s 2:14 Jon 1:1 ^t 2:14 Efes 6:10 ^u 2:14 1 Jon 2:13; Sam 119:9-11;
Jon 5:38; Hib 4:12; 1 Jon 1:10 ^v 2:15 Rom 12:2 ^w 2:15 Jem 4:4 ^x 2:16 Jen 3:6;
Rom 13:14; Efes 2:3 ^y 2:16 Prov 27:20 ^z 2:17 Hib 12:27 ^a 2:17 Mat 12:50

^b 2:18 Rom 13:11 ^c 2:18 1 Jon 2:22; 4:3; 2 Jon 1:7 ^d 2:18 1 Jon 4:1 ^e 2:19 Wok 20:30

^f 2:20 1 Jon 2:27; 2 Kor 1:21-22 ^g 2:21 2 Pita 1:12

tikmir kape Kristo. In rukreikin-pən nimeitaan kimi Rimtawə Kughen mine Tini, Yesu.^h 23 Yermamə yame rukreikin-pən nimeitaan kimi Tini, Yesu, reinein nofuginien ye Rimtawə Kughen. Mərig yermamə yame ramni nəfraksien ye Tini Yesu, rofugin ye Rimtawə Kughen.ⁱ

24 Rikimiə tukraməsik mipəh nisəru-kinien nəgkiarien yame nakwəsərig-ta kupən. Nəgkiarien a raməmir hanə irəmiə, mor əmiə naksofugin ye Rimtawə Kughen mine Tini, Yesu.^j 25 Kini nar a in a, nimraghien rerin, Kughen ruini-ta mə tukrivəhsi-pə kimi ətawə.

26 Yakamrai nəgkiarien minə e kimi əmiə mamni-ərhav narmamə yamə mine kasarkut tuk nivi-tayen əmiə.^k 27 Mərig kimiə, Kristo rinəvrai-pre-ta Nanmin Rhakə kimi əmiə, raməmir təvir hanə irəmiə.^l ?Ror pən, pə min rirkun nhajounien nar vi kirik kimi əmiə? Yermamə rirkək. Nanmin Rhakə, yame Kristo rinəvrai-pre-ta kimi əmiə^m ramhajoun narimnar fam kimi əmiə. Nhajounien a raməfrakis, mipəh neikuəyen nipig kirik. Nanmin Rhakə ramhajoun əmiəⁿ mə takasofugin ye Kristo mamharpin.

28 Kini taktəkun ai, kwajikovə minə kafak, takasofugin-pən ye Kristo pəh nipig tukruə,^o məm kitawə khapəh nhaginien, mhapəh nisaurisien tuk nisərerien ye nimrin.^p

29 Tukmə nakharkun mə Yesu In ratuatuk,^q takharkun mə narmamə m-fam yamə mine kasor norien atuutuk, iriə a kwajikovə minə kape Kughen.^r

Kimia e kwajikovə minə kape Kughen

3 1!Səmrui! Norkeikeiyen yame Rimtawə Kughen raməvrai-pə kimi ətawə rehuə mapita,^s in e Kughen ramhen ətawə mə kafan kwajikovə minə.^t Kini nəfraksien mə kitawə e. Narmamə ye tokrei tanə kaseinein ətawə meinai iriə kimiseinein Kughen.^u 2 Yo minə tiksini. Kitawə kwajikovə kape Kughen minə ai taktəkun. Kitawə khapəh nharkunien mə nipraitawə tukrhawor pən iran mine nipig Kristo tukrirerig-pə min. Mərig kitawə kharkun mə nipig tukrirerig-pə min,^v kitawə tuksəmhən kin In,^w meinai ye nipig a, tuksəm əfra mə In ror məkna.^x 3 Narmamə m-fam yamə mine kasərhə-pən nərigien kapəriə ye Kristo məkna, kasəspir-ta norien kapəriə,^y meinai Kristo min In ratuatuk. 4 Narmamə yamə mine kasor təvhagə has, masakapir min loa kape Kughen, meinai niprai nəgkiarien e “təvhagə has” nipran rimə “nakapirien loa kape Kughen.” 5 Kini kimiə nakharkun mə Kristo rimauə

^h 2:22 1 Jon 4:3; 2 Jon 1:7 ⁱ 2:23 Jon 8:19; 14:7; 1 Jon 4:15; 5:1; 2 Jon 1:9

^j 2:24 Jon 14:23; 15:4; 1 Jon 1:3; 2 Jon 9 ^k 2:26 1 Jon 3:7 ^l 2:27 1 Jon 2:20

^m 2:27 1 Kor 2:12 ⁿ 2:27 Jon 15:4 ^o 2:28 1 Jon 3:2; Kol 3:4 ^p 2:28 Efes 3:12

^q 2:29 1 Jon 3:7 ^r 2:29 Jon 1:13 ^s 3:1 Jon 3:16 ^t 3:1 Jon 1:12 ^u 3:1 Jon 15:21;

16:2,3 ^v 3:2 Kol 3:4; 1 Jon 2:28 ^w 3:2 Rom 8:29; 2 Pita 1:4 ^x 3:2 Jon 17:24; 2 Kor 3:18

^y 3:3 2 Kor 7:1; 1 Jon 1:7; 2 Pita 3:13,14

mə tukririsin ətawə ye təvhagə has.^z Təvhagə has rirkək iran.^a ⁶Yermamə yame ramofugin-pən ye Kristo to rapəh min nirpinien ye təvhagə has. Yermamə yame ramirpin-pən ye təvhagə has, ramhajoun mə in ripəh nəmien Kristo, mīpəh nirkunien In.^b

⁷Kafak kwajikovə minə, takhapəh niseighanien kin yermamə kirik mə tukrivi nərigien kapəmiə naksətəwao. Yermamə yame ramor norien yame ratuatuk, in en yemə atuatuk, rəmhen kin Kristo in ratuatuk. ⁸Mərig yermamə yame ramirpin əmə ye təvhagə has, ramhajoun mə in kape Setan, meinai Setan a in a rimnəkupən mor təvhagə has, kini mamor təvhagə has mamripin.^c Mərig Ji Kughen rimauə mə tukrəsür-əsür wok a kape Setan.^d ⁹Mərig yermamə yame rimnarha vi min muə kwajikovə kape Kughen,^e to ripəh nirpinien ye təvhagə has,^f meinai In ramofugin-pən ye Kughen. Meinein norien təvhagə has mamirpin, meinai rimnarha vi min muə kwajikovə kape Kughen. ¹⁰In e swatuk tuk nirkunien mə pa nhagin in kwajikovə kape Kughen,^g mine pa nhagin in kwajikovə kape Setan^h: Narmamə yamə mine khapəh nisorien nar atuatuk, kini mhapəh nisorkeikeiyen nəməhuak minə tiksın,ⁱ iriə a pəh nien mə kwajikovə kape Kughen minə.

Tukasəkeikei misorkeikei ətawə minə

¹¹Nəgkiarien e in e, nakwəsərig-ta kupən,^j mə kitawə tukasəkeikei misorkeikei ətawə minə.^k ¹²Rahas mə taksəri-pən norien kape kwən e Ken kupən, yame in yermamə kape Setan, in rimnhopni naorahini.^l ?Kini rimnhopni naorahini tuk naha? Meinai naorahini, kafan norien in ratuatuk, mərig Ken, kafan norien rahas.^m ¹³Ror pən kin, yo minə tiksın, takhapəh nisakurien nipig narmamə ye tokrei tanə kasəməkin əmiə.ⁿ ¹⁴Mərig kitawə kasorkeikei nəməhuak minə tiksın, ramhajoun mə kwənhatərhav ta ye kwənmhan kape nimhəyen, mhauə imei nimraghien.^o Mərig yermamə yame raməmək əmə, ramarə hanə ye kwənmhan kape nimhəyen.^p ¹⁵Kini yermamə yame raməməkin narmamə,^q in rəmhen kin yermamə yame ramhopni yermamə.^r Nakharkun mə yermamə yame ramhopni yermamə, ripəh nivəhyen nimraghien rerin.^s

¹⁶Yesu rimnarakikin nimraghien kafan tuk ətawə,^t mhajoun ətawə kin norien kape norkeikeiyen narmamə. Kini ye norien kirikianə əmə min, rhuvə mə kitawə tuksarakikin nimraghien kapətawə tuk nəməhuak

^z 3:5 1 Jon 3:8 ^a 3:5 2 Kor 5:21 ^b 3:6 1 Jon 3:9; 2:4; 5:18; 3 Jon 1:11 ^c 3:8 Jon 8:44

^d 3:8 Hib 2:14 ^e 3:9 Jon 1:13 ^f 3:9 1 Jon 5:18 ^g 3:10 1 Jon 3:1,2; Jon 1:12

^h 3:10 1 Jon 3:8 ⁱ 3:10 1 Jon 2:9; 4:8 ^j 3:11 1 Jon 2:7 ^k 3:11 Jon 13:34-35; 15:12;

1 Jon 4:7,11,21; 2 Jon 1:5 ^l 3:12 Jen 4:8 ^m 3:12 Prov 29:10 ⁿ 3:13 Jon 15:18,19;

17:14 ^o 3:14 Jon 5:24 ^p 3:14 1 Jon 2:9 ^q 3:15 1 Jon 2:9 ^r 3:15 Mat 5:21,22; Jon 8:44

^s 3:15 Gal 5:20,21 ^t 3:16 Jon 10:11

minə tiksin.^u ¹⁷Tukmə yermamə kirik, kafan nautə ripsaah, kini məm mə nāməhuak minə tiksin kasəkwakwə kin nar kirik, mərīg raməptig kin nautə kafan,^v ?norkeikeiyen kape Kughen raməmīr iran uə? !Nikam, rirkək!^w ¹⁸Kwajikovə minə, pəh kitawə tukhapəh nhani-əməyen norkeikeiyen ye nhertawə, mərīg pəh kisorkеikei əfrakis narmamə ye norien minə kapətawə.^x ¹⁹⁻²⁰Kasor norien minə a, mamharkun mə kasarə ye nəfrakisien. Nar apnapig mə kasərig yerkitawə mə khapəh nisəmhenien, mərīg khauə ye nīmri Kughen, rikitawə ramərinu əmə. Meinai Kughen rirkun rikitawə rapita ətawə. In rirkun narimnar fam.

²¹Yo minə tiksin, pəh khapəh nisərigien yerkitawə mə khapəh nisəmhenien, mhauə ye nīmri Kughen, rikitawə ramərinu əmə,^y ²²mīpihavəh naha nhagin yame kimisiayoh In kin,^z meinai kasor nəkwan,^a mine norien yame In rorkeikei.^b ²³Nəgkiarien yame Kughen rimivəhsi-pə ramni mə tukasəkeikei mhani nəfrakisien ye Tini,^c Yesu Kristo,^d misorkeikei ətawə minə rəmhen kin yame in rimini ta.^e ²⁴Yermamə yame raməri-pən nəgkiarien e yame Kughen rimivəhsi-pə,^f ramofugin iriu Kughen,^g kini Kughen ramofugin iriu min. Kini kharkun mə Kughen ramofugin kitawə min, meinai rinəvrai-pə ta Nanmin Kafan kimi ətawə.^h

Pəh kisəkir huvə nanmin minə

4 ¹Yo minə tiksin, profet ripsaah kamhani mhamə Nanmin kape Kughen raməmīr irəriə, mərīg takhapəh nhani-nəfakisien irəriə m-fam.ⁱ Taksokupən misəkir əmhen əriə, mə nanmin a raməmīr irəriə, kape Kughen əfrakis, uə nikam. Meinai profet eikuə khapsaah kwənhauə-ta ye tokrei tanə.^j ²In e swatuk tuk nirkunien mə Nanmin əfrakis kape Kughen raməmīr irəriə uə nikam: Tukmə yermamə rimə Yesu Kristo rimauə nipran ror niprai yermamə kin,^k yermamə a, Nanmin kape Kughen raməmīr əfrakis iran.^l ³Mərīg yermamə yame rapəh nini-ərhavyen Yesu, pəh nien mə Nanmin kape Kughen raməmīr iran. In e in tikmir kape Kristo.^m Kimiə nīmnharkun mə tikmir e tukruə ye tokrei tanə; kini ruauə ta.ⁿ

⁴Kwajikovə minə kafak, kimiə narmamə kape Kughen minə, nakwənhakurao-ta ye profet eikuə minə,^o meinai Nanmin yame raməmīr yerkimia in rapita nanmin yame raməmīr ye tokrei tanə.^p ⁵Iriə,

^u 3:16 Jon 15:13; 1 Tes 2:8 ^v 3:17 Dut 15:7,8; Jem 2:15,16 ^w 3:17 1 Jon 4:20

^x 3:18 Esik 33:31; Rom 12:9 ^y 3:21 Efes 3:12; 1 Jon 5:14 ^z 3:22 Mat 7:7

^a 3:22 Jon 14:15 ^b 3:22 Hib 13:21 ^c 3:23 Jon 6:29 ^d 3:23 Jon 1:12; 3:18;

20:31 ^e 3:23 Jon 13:34 ^f 3:24 1 Jon 2:3 ^g 3:24 1 Jon 2:6; 4:15 ^h 3:24 1 Jon 4:13

ⁱ 4:1 Jer 29:8 ^j 4:1 Mat 7:15; 1 Jon 2:18 ^k 4:2 Jon 1:14; 1 Jon 2:23 ^l 4:2 1 Kor 12:3

^m 4:3 1 Jon 2:22; 2 Jon 1:7 ⁿ 4:3 1 Jon 2:18 ^o 4:4 Jon 16:33 ^p 4:4 2 King 6:16; Rom 8:31

narmamə kape tokrei tanə,^q ror məkneikin mə nəgkiarinen kapəriə, kape tokrei tanə əmə; kini narmamə yamə mine kasətərig kin əriə, iriə min narmamə kape tokrei tanə. ⁶Mərig kitawə narmamə kape Kughen minə. Ror məkneikin, narmamə yamə mine kharkun Kughen, iriə kasətərig kin ətawə. Mərig narmamə yamə mine kaseinein Kughen, iriə khapəh nisətərigien kin ətawə.^r In e swatuk tuk nirkunien Nanmin əfrakis^s kape Kughen mine nanmin eikuə.^t

Norkeikeiyen kape Kughen

⁷Yo minə tiksın, pəh kitawə kisorkeikei ətawə minə,^u mhawor norkeikeiyen ramsi-pən tuk Kughen. Kini narmamə yamə mine kwəsarha vi min mhauə kwajikovə kape Kughen minə,^v kini minharkun-ta Kughen, iriə kasor norkeikeiyen.^w ⁸Kughen, In nuknei norkeikeiyen. Ror məkneikin mə narmamə yamə mine kaseinein Kughen, kapəriə norkeikeiyen rirkək. ⁹Kughen rimnor əpu kafan norkeikeiyen kimi ətawə məkneikin: In mher-pə kin Tini kwənkwan kirikianə əmə,^x ruə ye tokrei tanə, mə kitawə tukhavəh nimraghien tukun.^y ¹⁰Norkeikeiyen əfrakis ramni məknekin mə, “Pəh nien mə kitawə kimisorkeikei Kughen, mərig In rimnorkeikei ətawə^z mher-pə kin Tini ruə, kini mivəhsi-pən narpinien kape təvhagə has kapətawə kimin, nitawin rimnaiyu.”^a ¹¹Yo minə tiksın, Kughen rorkeikei ətawə ror məkneikin,^b kitawə min tukasəkeikei misorkeikei ətawə minə.^c ¹²Kipəh nəmien Kughen nipig kirik.^d Mərig tukmə kitawə kasorkeikei ətawə minə, ramhajoun mə Kughen ramarə yerkitawə, norkeikeiyen kafan ramkuə kin norkeikeiyen yerkitawə.^e

¹³Kughen rimnəvrai-pə Nanmin kafan kimi ətawə kini kwənharkun mə kasofugin-pən tuk Kughen,^f kini In ramofugin-pə tuk ətawə.^g ¹⁴Kini kimawə yakwəsəm ta kini mamhani-ərhav^h mə Rimtawə Kughen rimnherpə-kin Tini mə tukrivəh miragh narmamə m-fam.ⁱ ¹⁵Narmamə yamə mine kamhani-ərhav mə Yesu in Ji Kughen, ramhajoun mə Kughen ramarə irəriə, kini iriə kasarə min iran.^j ¹⁶Ror məkneikin mə kitawə kwənharkun-ta mə Kughen rorkeikei ətawə, kini kitawə kasətigə min ye norkeikeiyen kafan.

Kughen in norkeikeiyen.^k Narmamə yamə mine kasor norkeikeiyen, ramhajoun mə kasofugin-pən tuk Kughen, kini Kughen ramofugin-pən tuk əriə.^l ¹⁷Kitawə tuksarə məknekin, norkeikeiyen tukrikuə kin norkeikeiyen yerkitawə,^m mə kitawə tukhapəh nhaginienⁿ ye nipig yame

^q 4:5 Jon 15:19; 17:14,16 ^r 4:6 Jon 8:47 ^s 4:6 Jon 14:17 ^t 4:6 Mak 13:5

^u 4:7 1 Jon 3:11 ^v 4:7 Jon 1:15 ^w 4:7 1 Jon 2:4 ^x 4:9 Jon 1:18 ^y 4:9 Jon 3:16,17; 1 Jon 5:11 ^z 4:10 Rom 5:8,10 ^a 4:10 Rom 3:25 ^b 4:11 Jon 3:16 ^c 4:11 Jon 15:12; 1 Jon 3:11 ^d 4:12 Jon 1:18 ^e 4:12 1 Jon 4:17; 2:5 ^f 4:13 1 Jon 2:3 ^g 4:13 1 Jon 3:24

^h 4:14 Jon 15:27 ⁱ 4:14 Luk 2:11; Jon 3:17 ^j 4:15 1 Jon 3:24 ^k 4:16 1 Jon 4:8

^l 4:16 1 Jon 3:24 ^m 4:17 1 Jon 4:12; 2:5 ⁿ 4:17 Efes 3:12

Kughen tukrækir narmamə iran, meinai tukəm mə kapətawə norien ye tokrei tanə rəmhen əmə kin norien kape Yesu. ¹⁸Mərig norkeikeiyen mine niginien to krapəh niwəmir-kwis-ien. Norkeikeiyen əfrakis ramsig-yerhav niginien.^o Tukmə rikitawə raməsik mə tukhavəh narpinien kirik, ramhajoun mə norkeikeiyen ripəh hanə nikuəyen kin norkeikeiyen yerkitawə.

¹⁹Kitawə kasorkeikei ətawə minə meinai Kughen rimnorkeikei ətawə məkupən. ²⁰Mərig yermamə yame ramni mə rorkeikei Kughen, marar maməməkin in minə tiksini,^p rameikuə.^q Meinai tukmə yermamə kirik raməməkin in minə tiksini yamə mine raməm əriə,^r ?tukrhawor morkeikei Kughen yame rapəh nəmien In nipig kirik? To rapəh norien.^s ²¹Kini Yesu rimivəhsi-pə nəgkiarien kirik mə tuksor: Tukmə nakorkeikei Kughen, takaməkeikei morkeikei min ik minə tiksini.^t

Kwəsapita norien kape tokrei tanə

5 ¹Narmamə yamə mine kamhani nəfrakisien^u mə Yesu in Kristo yame Kughen rimirpen, iriə en kwəsarha vi mhauə kwajikovə minə kape Kughen.^v Kini narmamə m-fam yamə mine kasorkeikei Rimtawə Kughen, iriə kasorkeikei min kwajikovə kape Kughen minə.^w ²Kitawə kwənharkun ta mə tukmə kitawə kisorkeikei Kughen, masor nəkwən,^x tukasəkeikei misorkeikei min kwajikovə kape Kughen minə.^y

³Tukmə kasor nəkwai Kughen,^z ramhajoun mə kasorkeikei Kughen. Kini kafan loa rəmhen kin kajipə yame rəruvəruvə əmə,^a ⁴meinai narmamə yamə mine kimisarha vi mhauə kwajikovə minə kape Kughen,^b iriə kwəsapita norien minə kape tokrei tanə. Kini nhatətəyen kapətawə ravəhsi-pə nəsaninien tuk napitayen norien kape tokrei tanə. ⁵?Ni-pa minə e kwəsapita norien kape tokrei tanə? Iriə e yamə mine kamhani nəfrakisien mə Yesu in Ji Kughen.

Kinor əpu Yesu

⁶Yesu Kristo ritərhav-pə ye nu mine nitə. Pəh nien mə ye nu əmə, mərig rimauə ye nu mine nitə.^c Kini Nanmin kape kughen ramni-ərhav mə nəfrakisien, meinai Nanmin kape Kughen in nuknei nəfrakisien. ⁷Nar misir e in e kisisə karhor əpu Yesu:^d ⁸Irisir e: Nanmin Imərhakə, mine nu, mine nitə^e. Nar misir e kisisə karhajoun Yesu. ⁹Nipig kirik, kitawə kisərig nəgkiarien yamə mine narmamə kamhani-ərhav, kini kitawə

^o 4:18 Rom 8:15 ^p 4:20 1 Jon 2:9 ^q 4:20 1 Jon 1:6; 2:4 ^r 4:20 1 Jon 3:17

^s 4:20 1 Jon 4:12; Jon 1:18 ^t 4:21 1 Jon 2:7,9 ^u 5:1 Jon 3:15 ^v 5:1 Jon 1:13; 1 Jon 2:22; 1 Jon 2:23 ^w 5:1 1 Jon 2:23 ^x 5:2 1 Jon 2:3 ^y 5:2 1 Jon 3:14 ^z 5:3 Jon 14:15

^a 5:3 Mat 11:30 ^b 5:4 Jon 1:13 ^c 5:6 Jon 19:34,35 ^d 5:7 Jon 14:17 ^e 5:8 Nipig Jon ramni “nu” nipran ramni “baptaes,” kini niprai “nitə” nipran ramni “nimhəyen kape Yesu.” Nar misir e baptaes, mine nimhəyen kape Yesu, mine Nanmin Rhaka, karhaor əpu Yesu.

kamhani nəfrakisien irəriə.^f Mərig nəgkiarien yame Kughen ramni-əhrav ye nıkarın kape kafan Kwajikovə, in rehuə pik mapita, meinai Kughen^g a in a ramni-ərhav. ¹⁰Narmamə yamə mine kamhani nəfrakisien ye Ji Kughen, ramhajoun mə nəgkiarien yame Kughen ramni-ərhav rınəmır ta yerkiria. Mərig narmamə yamə mine khapəh nhaniyen nəfrakisien ye Kughen, rəmhen kin iriə khamə Kughen In yeikuə kirik.^h Meinai khapəh nhaniyen nəfrakisien ye nəgkiarien yame Kughen ramni-ərhav ye nıkarın kape kafan Kwajikovə.

¹¹In e nəgkiarien yame Kughen ramni-ərhav, mə Kughen rıvəhsi-pə nımraghien rerinⁱ kimi ətawə, kini nımraghien e, kivəh tuk Tini.^j

¹²Narmamə yamə mine kamhavəh Ji Kughen yerkiria, iriə kamhavəh nımraghien. Mərig narmamə yamə mine khapəh nhavəhyen Ji Kughen yerkiria, khapəh nhavəhyen nımraghien.^k

Nəgkiarien infamien

¹³Yakamrai nəgkiarien minə e kimi əmiə yamə mine nakshatəta ye nhag Ji Kughen, mə kimia takharkun huvə mə nakwənhavəh ta nımraghien rerin.^l ¹⁴Kini tukmə kitawə khauə ye nımri Kughen, rikitawə ramərinu,^m meinai kitawə kharkun mə tukmə kisaiyoh kin naha nhagin ratuatuk ye nərigien kape Kughen, In tukrərig nəhuakien kapətawə.ⁿ

¹⁵Kharkun mə In ramərig ətawə, mharkun min mə tukpihavəh naha nhagin yamə mine kitawə kisaiyoh In kin.^o

¹⁶Tukmə kitawə kasəm yeməhuak kirik ramor təvhagə has, mərig pəh nien mə təvhagə has yame rirkun nikir-pənien ye nımhəyen, pəh kisəhuak tukun, kini Kughen tukrīvəhsi-pən nımraghien kimin.^p Mərig təvhagə hah kirik aikin yame ramkir-pən narmamə ye nımhəyen,^q kini yakpəh niniyen mə tüksəhuak tuk narmamə yamə mine kasor təvhagə hah ai yame ramkir-pən narmamə ye nımhəyen.^r ¹⁷Norien has minə fam e, in təvhagə has,^s kini mərig təvhagə has minə tiksin aikin khapəh nhakir-pənien narmamə ye nımhəyen.^t

¹⁸Kitawə kharkun mə narmamə yamə mine kwəsarha vi mhaue kwajikovə minə kape Kughen^u khapəh nharpinien ye təvhagə hah, meinai Ji Kughen rampik ətərinkin əriə, kini yemə has e Setan reinein

^f 5:9 Jon 5:33,34 ^g 5:9 Mat 3:16,17; Jon 5:32,37; 8:17,18 ^h 5:10 Jon 3:33;

1 Jon 1:10 ⁱ 5:11 Mat 25:46 ^j 5:11 Jon 1:4 ^k 5:12 Jon 3:15,16,36 ^l 5:13 1 Jon 5:11

^m 5:14 Efes 3:12; 1 Jon 3:21 ⁿ 5:14 Mat 7:7 ^o 5:15 1 King 3:12 ^p 5:16 Jem 5:15

^q 5:16 Hib 6:4-6; 10:26 ^r 5:16 Tukmə ror “təvhagə hah yame ramkir-pən narmamə ye nımhəyen” nipran ramni “kamni hah Nanmin Rhakə.” Yesu rimini ye Mak 3:28-29 mə, “Ror pən, yakamni-pre əfrakis tuk əmiə, mə Kughen rirkun niwəhsi-tayen nahasien minə fam yame nakasor, uə nini-hasien yame nakasor iran. Mərig tukmə nakhani has Nanmin Imərhakə, to Kughen ripəh niwəhsi-tayen nipig kirik. Təvhagə hah a tukraməmir kape rerin.” ^s 5:17 1 Jon 3:4 ^t 5:17 1 Jon 5:16; 1 Jon 2:1 ^u 5:18 Jon 1:13

nirap-rapien əriə.^ν ¹⁹Kini kharkun mə kitawə e kwajikovə kape Kughen minə,^ω mərig narmamə m-fam kape tokrei tanə, iriə kasəmir ye kwermi Setan.^x ²⁰Kitawə kharkun min mə Ji Kughen rimauə kini mivəhsi-pə nirkunien kimi ətawə,^γ mə tukharkun Yermamə e yame In nəfrakisien.^z Kini kitawə kasofugin-pən tuk Kughen yame In nəfrakisien, misofugin-pən min tuk Tini, Yesu Kristo, yame In Kughen əfrakis, mine nuknei nimraghien rerin.^a

²¹Kwajikovə minə kafak, səmir isok tuk nanmi nar yamə mine kamhavəh tamhek Kughen yerkimia.^b

^ν 5:18 Jon 14:30 ^ω 5:19 1 Jon 4:6 ^x 5:19 Jon 12:31; 14:30; 17:15 ^γ 5:20 Luk 24:45

^z 5:20 Jon 17:3 ^a 5:20 1 Jon 5:11 ^b 5:21 1 Kor 10:14; 1 Tes 1:9